

東文選

百二十七

内閣文庫	
番號	漢 17777
冊數	130 (127)
函號	圖116 1





東文選卷之一百二十七

墓誌

栗亭先生尹文貞公墓誌銘

并序

李穡

栗亭先生既葬三月孫紹宗以所撰家狀求銘其墓嗚呼公亡矣余自燕京奔先子喪先生先諸公來哭哭既畢執余手歔歔良久乃去蓋今二十年矣不敢忘也而道途之遠也不獲匍匐往哭銘其可辭乎敘曰公諱澤字仲德曾大父良庇茂松縣戶長大父諧正獻大夫國學大司成文翰司學致仕司錄尚州民有亂其姝者時旱甚正獻與長官

東坡文選卷一百二十七
爭竟置極刑天果雨歷任刑憲剛正自持慶尚全
羅揚廣淮陽皆所按察其爲中丞饘粥不繼煎豆
充飢而已世號清白考守平贈奉翊大夫密直副
使先正獻歿妣金氏進禮郡夫人以至元己丑生
公公生三歲就學既授輒成誦正獻每見公有警
句抱之泣曰興吾門其汝乎守平爲不死矣稍長
痛自樹立從姑夫尹狀元宣佐讀書無不通究尤
長於左氏春秋常誦范文正公先天下之憂而憂
後天下之樂而樂以謂大丈夫寧可碌碌耶延祐
丁巳中進士舉庚申中秀才科寶劍賦第一人多

誦之調京山府司錄董耕葺學勸民追遠禮俗以
興入錄書籍事爲校勘爲檢閱官纔九品自視宰
輔或以爲侮公傲然處之不疑至順壬申毅陵在
燕邸公單騎上謁一見器重因有托孤之語意在
今上也公拜謝臣且老矣何能爲明年上駐駕西
京以檢閱權叅軍供頓有制民賴以安上每歎曰
賢哉回也以公貌類西人故云詔使至命公讀詔
左右曰讀詔自有內外製叅軍恐非例上曰叅軍
爲兩製顧不在吾耶遂命權應教賜紫未幾欲擢
爲府尹以資淺陞判官或誣公不遜上曰尹生忠

必汝罔也戊寅拜右副代言掌銓選上欲官公子
護軍公曰名器至重賢勞猶滯敢私臣子上愈重
之己卯轉右代言試士成均取安元龍等九十九
人多知名士三月癸未上寢疾上復以燕邸所語
語公公跪曰無煩聖慮求陵立改政圖新公屏居
自頤明陵立被選牧羅州公盱至政尚寬恕什強
植弱聰陵立貶光陽監務初明陵薨民望歸今上
公倡議拜書都堂言本國兄弟叔姪相繼之故少
主不堪保釐之狀辭甚剴切聰陵嚙之故有是命
歲辛卯上初政入密直為提學慨然自任以當世

之事上疏建白不允乃以開城尹致仕公年六十
有四矣近臣議追鄉樂公聞之上疏曰世皇已嘗
却之今復進恐取譏又以節用上言上深納之築
宮南京公言釋妙精惑仁廟幾至覆國厥鑑不遠
矧今四境當備他盜訓兵養士猶懼不給興工勞
衆恐傷本根上命寫無逸篇賜宰臣命公講因陳
周公輔成王勤勞曰願殿下成法成王能聽周公
之訓嚴恭抑畏社稷之福上為動容公以真西山
大學衍義本朝崔中令承老上成廟書皆進講時
上深味空桑之譚超然有遠舉之志公曰殿下上

奉宗廟下保生靈柰何欲效匹夫廢絕倫理之事乎如聽臣言非孔子之道不可願加聖意白岳之役公極言其弊因曰凡事得失聖意雖灼其然委之大臣未即處分因仍之際其害已成救之莫及上賜酒公一飲三卮神氣自若前侍中洪彥博嘆曰不謂尹公戇直至此吾所不及也公雖致事自以先朝顧托知無不言或至切直上亦優容焉甲辰公年七十六疾作乞歸錦州以山水自娛者七年而憂君之心未嘗食息忘庚戌八月丙子前子孫而訓之曰吾正獻興寒地以清白忠直名一時

吾先君不幸早世吾夙夜不克繼志是懼誤爲上知寵祿過望年愈八旬此皆先世潛德正獻清白之所遺也若等其守之母墜我且死葬母拘忌用浮屠法母後九月丁酉卒是夕天大風以雨旣棺乃止已亥窆于大夫人之墓側計闈上悼甚下大常謚曰文貞公之哀榮可謂無缺矣公旣早孤不及識先君面時祭上冢必哭甚哀公於方策見述父子之情未嘗不垂涕氣塞不能言常佩一囊得異味必盛之歸獻大夫人不以非笑少止尹狀元歿女孫二人孤無所依公曰吾而不恤吾姑夫之

孫吾尚爲人乎擇士入嫁之游燕時道見遺金百兩守以待其主其主泣謝而去略無德色公平生布被弊席饗殮或缺晏如也至春秋良晨必置酒邀客其任情自適又如此公凡四娶文氏進士富之女生龜生散負次李氏侍衛護軍長衍之女生鳳生別將女適進士金耀次適故起居郎知製誥許湜次奇氏贈密直副使璉之女生東明及弟理部散郎女適郎將朴龜齡又娶奇氏檢校大護軍鼎輔之女生故進士李存中室孫男九人孝宗散負癸巳進士昌宗散負嗣宗興順宮錄事宣暢學

浮圖紹宗乙巳科狀元禮部散郎會宗興宗牧監直茂宗秀宗女四人外孫二人許操成均生負朴成女三人曾孫四人皆幼嗚呼磊落奇偉非常之材不世出出而不遇與遇而不用與用而不久皆天也若栗亭先生之遇毅陵之知可謂千載一時而毅陵上賓之亟今上既深知先生手寫真書栗亭二字以賜其遇極矣而公在政府才數閱月而致仕家居者十有九年抗論雖切竟亦何補嗚呼悲夫銘曰
堂堂文貞高視闊步雖厠末寮巍然宰輔毅陵一

見出示肺腑溫言托孤果叶所負既試參軍欲尹
其府姑陞判官可謂奇遇出納王言參與銓注蓋
將納麓鼎湖淚雨扶日至忠先屯後亨人望公庸
公懷不平不平伊何我言丁寧如藥瞑眩云胡不
聽惟錦之山有鬱其蒼有氣屬天實公幽堂厥或
不信眎此刻章

鐵城府院君李文貞公墓誌銘 并序

至正甲辰五月初五日推誠守義同德贊化翊祚
功臣壁上三韓三重大匡鐵城府院君李公年六
十八以病卒于第大常諡文貞有司供葬事如典

故六月初九日窆大德山夫人洪氏域中明年上
思公親命工畫其形旣肖錫朋酒以祭季子岡泣
謝退徵稽銘曰銘之不蚤若有待今可銘矣稽以
岡故父事公嗚呼忍銘諸公諱君佻字翼之後避
兇人名改岳字古雲晉州固城縣人曾大父諱瑁
及弟不仕大父諱尊庇用儒術事忠烈王掌銓選
餘三十年試士成均又知貢舉卒官判密直司事
監察大夫父諱瑀以材幹歷使淮陽金海全晉二
牧所至有遺愛封鐵原君妣朴氏咸陽郡夫人父
諱之亮判三司事有功至元間天子賜金符授萬

夫長公髫鬣異凡兒入小學已稱善書年十七中
癸丑科知貢舉權政丞崔贊成大加賞異曰公輔
器也自是學大進華問日播毅陵愛其才命典符
印除官秘書省由校勘再遷爲郎注簿丹陽府佐都
官就陞正郎永陵初元以典儀令擢密直司代言
兼監察執義同知辛未貢舉至元庚辰復職知申
事俄改成均大司成階奉翊未幾有旨成均師道
所在任亦重矣然左右予理兩府實專其職其予
樞密同知命下朝士相慶曰善人與政矣既而遷
政堂文學僉議評理知辛巳貢舉是時用事者詆

姍我儒公孤立無助志竟不得行然亦多所匡救
焉明陵立眷顧益豐加贊成事聰陵立以爲先王
舊臣之中有德有勞惟李某可輔予政遂拜左政
丞未幾罷今上還國欲用公未果今襲父封開府
以致敬三年癸巳公自念年將六十位亦極矣不
以此時乞骸骨復何竢去入清平山上求理甚急
徵禮耆老公還諭留之時時召入對遂決意用公
八年戊戌秋復爲守侍中己亥冬毛賊犯北鄙以
公爲兵馬都元帥往督諸軍軍未集而賊已近矣
西京守臣謀守不可又欲謀焚倉廩公曰非計也

賊遠聞其鋒不可當不中止其勢必震我國都欲賊中止莫若啗以此城可令吾民挈老幼東走鑄倉廩屋廬無所壞賊見必怯我亦且少駐怯我心驕少駐氣衰俟吾軍集可一旦襲取安知今日所欲焚者不爲吾他日用乎未踰月賊果敗如公所料倉廩屋廬完全如初辛丑冬從幸安東功第一明年賊平行賞公面奏今不幸懼茲多故將相須才臣以無狀以叨尤揆請避賢上愈益嘉其無他加賜功臣號封君奉朝請公於官勤謹守繩墨無一毫假貸於家不問有無費圖書自娛淡如也與

禪源息影老人爲方外友築堂寺中扁曰海雲扁舟往還至輒忘歸蓋其雅量如此杏村其自號也嘗手寫太甲篇以獻語其子岡曰汝志之吾既老矣無官守無言責當以格君心爲務爾公自祕書以至宰相必與銓選予奪不少私故終身無怨言前後門生多達官聞人諸子皆有所樹立嗚呼天之報施善人其有徵哉夫人侍中謚忠正諱子藩之曾孫右代言諱承緒之女先公二十七年歿胤慶配德母有多子男四人寅中正夫夫宗簿今次崇正順大夫判典容寺事次蔭與平毛賊以功拜

上將軍辛丑冬戰歿安州次即而今爲密直司知
申事藝文館提學知製教知典理司事女二人一
適判事金光丙一適淮陽府使趙慎側室子曰牧
郎將孫男某某官曰某曰某孫女若干外孫金某
某官曰某曰某外孫女若干銘曰

巍巍文貞開府鐵城初宅尤揆曰噫戒盈奉身而
退水綠山明如雲卷舒香乎無情還居廟堂不動
色聲長蛇封豕就戮西京天啓公衷從容策成俾
驕以覆九廟不驚人始歎服詩書用兵大已蓋世
其細奚評王曰元老雖死猶生我儀圖之以風列

卿旣成旣肖明裡繼俾列卿用勸子孫與榮自古
在昔君臣聚精不亡其亡匪他曰誠詔爾太史尚
徵斯銘

松堂先生金公墓誌銘

并序

至正辛巳予年十四赴成均試在庭中望見先生
具袍笏端坐儼然如泰山喬嶽群士屏氣不敢譁
旣爲門生往來聽教則溫言柔色推明國典獎誘
人材豐豐不已慨然有風俗日頽之嘆居家不理
生產左右琴書澹如也栽松東岡植蓮南池每歲
庭中牧丹花開具酒食召門生上大夫入壽兄弟

子姓怡怡愉愉孝悌之至通于神明大夫人享九十一歲之壽嗚呼盛矣歲丙申三月大夫人以病卒葬于皇考文正公之墓次居其傍終制先生素以病艱於行步然朝夕奠洒掃必親無少輟國俗守父母墳多以奴代私爲復其身先生不忍褻其親躬行之蓋近世宰相所未有也先生姓金氏諱光載字子輿號松堂居士光州人司空金吉之後也司空佐太祖有功其裔孫諱匡瑞中郎將中郎將生諱偉三司使三司使生諱鏡亮大將軍大將軍生監察御史諱須元初三別抄者不樂內附叛

入海島御史守靈光死之御史娶國子祭酒高公諱瑩中之孫某官諱夢卿之女年至百二歲初高氏夢見明星入懷中生快軒先生文正公諱台鉉以四世元老爲國著龜政丞致事嘗集國初以來文章目曰海東文鑑行于世掌試成均知貢舉所取士多聞人竹溪安謹齋崔拙翁尤其傑然者也先娶行首郎將金儀之女生一男曰光軾官至選部議郎繼室以太祖子孝隱之後侍郎諱丁旦之女生三男二女長光轍及弟官至密直使次先生次光輅及弟女長適政堂文學安牧次適密陽君

朴允文公之昆季三人既登科大夫入受廩祿終
其身朴氏子四人安氏孫三人皆登科時人歆之
公以至元甲午正月甲子生既生而身長二尺餘
父母異之絕愛之既冠中皇慶癸丑科座主一齊
先生權政丞愛其知禮厚待之補成均學官至順
庚午從忠惠王京師以勞授司僕寺丞遷都官正
郎後至元己卯忠惠王幾為曹頤所廢而幸勝之
然其儻多附勢必將甘心焉及王如京師公曰吾
君危矣吾忍獨免乎哉往從之賴天子聖明復爵
東還實庚辰秋七月也以軍簿摠郎參銓選事累

轉成均祭酒三司左尹判典校寺事皆兼館職知
製教明年秋掌試成均取今知密直司事成士達
等九十九人時稱得士忠惠王素憚公嚴左右又
多忌之顧無所藉口迺曰金公愛靜仕進非其志
也上稍信之乃褫其職群小益張癸未冬岳陽之
禍起矣甲申忠穆王立起公為右副代言遷至知
申事用事大臣惡不附已白授版圖判書未幾上
悔之即拜密直副使提調銓選事陞知司己丑忠
定王立開書筵以公為師公固辭入僉議為評理
匡靖大夫藝文館大提學知春秋館事上護軍仍

提調銓選事俄改三司右使入告于王曰文選吏
曹掌之虎選兵曹掌之摠于政房自權臣始非令
典也殿下如聽臣言仍舊便從之然必公命公兼
典理判書辛卯冬十月玄陵嗣位公杜門不出奉
養大夫人朝夕盡禮及其琴祥侍中洪陽坡先生
與一時名卿往勞苦之公曰吾年六十三始居于
茲常懼一旦身先朝露以爲宗族羞獲至今日考
妣之德也言畢泣下諸公皆泣下嘆服既還設版
位於堂北隅每行事泣不止以舊病不出門玄陵
聞其風使使諭公曰思與公語久矣不識可使寡

人得見乎公惶恐子姪扶以入上曰年顏非甚衰
也而有斯疾何耶嘆惜者久之命有司旌表所居
曰靈昌坊孝子里復其里若干戶以奉事焉辛丑
冬十一月避紅賊至高昌縣因留居之癸卯春三
月感微恙起居語言無少變十四日旣晚謂夫人
曰吾今年七十死復何恨男子不絕於婦人之手
禮也可與衆婢退矣且戒無或高聲疾語以擾我
也俄而絕平日所養可知已子壻扶柩還京某月
甲子葬于德水先塋公娶門下平章謚良簡金公
諱承澤之女生子二人男曰興祖侗儻有志官至

中顯大夫軍器監歷使水原海州政績頗著死於
驚城之手人至今憐之女適奉善大夫內府副令
朴門壽新羅始祖奕居世之後也孫男女若干人
軍器娶監察大夫申仲全之女生一女適郎將宋
義審內府生二男長叢好學尚志前奉善大夫左
右衛保勝護軍李苞進士典儀錄事外曾孫若干
人皆幼護軍以公行狀徵銘於韓山李穡曰子宜
銘乃受而敘之嗚呼先生之德行政事表表如此
宜其子孫之多也而軍器監無後是天之未定也
是天之好惡與人殊也嗚呼悲夫幸而朴氏存焉

士之樹立以顯其外大父者史不絕書朴氏其勉
旃其勉旃銘曰

惟東有岡有松蒼蒼君子之宅池水之盈蓮香之
清君子之德出以事君有政有文正我王國入以
事親愈老愈真化我民俗先生之風被于海東永
世攸則我作斯銘匪私先生史筆之直

海平君謚忠簡尹公墓誌銘并序

善之海平望姓尹氏也諱君正歷事高王元王官
至金紫光祿大夫守司空尚書左僕射判工部事
諱萬庇事忠烈王爲己巳一等功臣卒官奉翊大

夫副知密直司事上護軍諱碩政丞公也朝廷使者至政丞時爲別將以盞人立于王前使者傳旨兩王子入侍天庭政丞聞之默自念吾當從弟歸告尊公尊公曰兒計失矣所以從王子者爲後日計也兄在而弟先有國乎公又告曰吾亦知其然然吾見少則敬心生見長則否此所以決吾策也尊公不復語長元子早亡少忠肅王也公從朝京師僚佐未有居公右者其後歷官至都僉議右政丞判典理司事封海平府院君階壁上三韓三重大匡賜忠勤節義同德贊化保定功臣之號亦未

有居公之右者君臣遭逢千載一時豈非天乎其後天子聞公名特授鎮國上將軍高麗都元帥以寵異之海平娶奉翊大夫密直副使上護軍李公諱百年之女以至大庚戌四月癸亥生公延祐庚申公年十一而補泰雲寺真殿直十五而補司設真長十六而授郎將十九而拜護軍從求陵在朝之明年也時晉邸陟遐文宗自江南先入宮正位迎明宗于朔方文宗出勞于野丞相燕帖木兒進毒酒明宗中夜崩六軍亂公與宰相曹益清李君佖等官左右求陵求陵恃以無恐賜功臣鐵券至

順庚午陞大護軍公年卅一也至正辛巳進判司
僕寺事明陵即位之五月拜上護軍冬陞軍簿判
書明年四月遷典理判書王政丞當國用舊法文
選歸之典理武選歸之軍簿公佐政丞無毫髮私
明年出尹平壤試公臨民也甫一期而政成以知
密直召公年三十八矣玄陵之五年再知密直司
事其冬奉表朝于京師謝賜衣也十八年三知密
直司事洪武庚戌進密直使明年知門下省事商
議會議都監事又明年進評理冬封重大匡海平
君與廉曲城尹漆原諸老結社從容者十餘年而

壬戌九月感疾十月初九日端坐而逝公年七十
又三矣公稟性寬厚不立崖岸略通蒙古語舉止
如北庭人於政事務遵大體而不苛細蓋長者也
公凡再娶平壤郡夫人趙氏大匡僉議贊成事商
議寶文閣大提學謚文克諱延壽之女李氏大匡
月城君諱菴之女趙氏生男二人長曰寶官至鷹
揚大護軍先歿次曰珍重大匡海平君孫男女若
千人鷹揚男曰可觀今爲奉翊大夫密直副使上
護軍出爲慶尚道副元帥一女適尉衛注簿李持
海平君男曰彰今爲典理佐郎次曰華今爲德昌

府舍入次曰須今爲春秋檢閱長女適判事金九
容次適郎將洪潤福次適司設署命成溥李夫人
無子曾孫男女若干人某某公之奉表謝恩也予
爲書狀官公之長子予同甲也故父事公予僥倖
入樞府而公復職爲同寮然予之事公也如昔而
公亦視予猶子吾宜銘公公之季子政堂公今嗣
封其知貢舉也又取豚犬種善爲門生銘又可辭
諸銘曰

海平之尹左右高元君子之澤流慶源源惟元帥
公蔚爲侍中忠簡承之有長者風少而翹英老而
公求于藏

有元高麗國忠勤節義贊化功臣重大匡瑞
寧君謚文僖柳公墓誌銘

并序

玄陵功臣曰文僖公姓柳氏名淑字純夫至正辛
巳以待學從玄陵居燕京十一年受履以東叅掌
機密十五年退老子鄉以避驚城之禍者四年既
卒四年而驚城誅又六年而配享大室又三年而
韓山李穡銘其墓嗣子密直公之請也嗚呼忍銘

諸至正丙戌先君稼亭公頌曆東方文僖公實從
之來稽始得內交焉其後同事玄陵稽或時妄發
言觸怒公輒救之其於銘墓義所不辭按其婿李
行所撰公狀柳氏瑞州人也曰公器承奉郎閣門
祗候曰宏贈僉議評理上護軍曰成桂通議大夫
大常卿知茶房事公之三代也妣姜氏贈都僉議
贊成事諱文世外大父也室楊氏吳氏男實奉翊
大夫密直副使商議會議都監事上護軍厚奉常
大夫軍簿摠郎女三人適中顯大夫繕工令金子
盍承奉郎叛圖佐郎崔正濡楊氏出也一適宣德

郎義盈庫副使李行吳氏出也孫若干人密直男
曰惠剛別將曰惠南學浮圖法曰惠和散貧女適
丁巳科狀元承奉郎典儀注簿成石珣摠郎男曰
沂曰漢女一人外孫若干人繕上男曰汾曰潭副
使男曰逖曰迹女一人佐郎女一人公之初入學
也精舍主人夢見灑掃院宇問何為對曰柳承旨
來明日公至心異之年十六中辛未進士科諫議
大夫金右鏐其試官也二十五中庚辰及第科政
丞金筠軒亦敷贊成事安謹齋軸其座主也至正
辛巳調安東司錄會玄陵以王大弟江陵府院君

入侍天庭公棄官從之居四年歲在甲申明陵即位江陵僚佐多不守節公獨不變明陵義之冬授吉昌府典籤明年升開城叅軍公益堅無他嘗一覲親既至則史翰交章薦公補春秋修撰官公曰儒林重選也吾雖不才亦足以慰吾親矣遂就職即頒曆歲也明年丁亥忠烈忠宣忠肅實錄既成命公馳駟藏之海印史庫秋遷三司都事即棄去如京師時掌銓選官以爲柳史官供史職既有勞宜錄用授官秩六品明陵薨王政丞倡議上表請玄陵嗣位又以耆老衆官書達中書省稼亭公實

執其筆旦夕命且下公聞母病即日請歸或止之公曰忠臣孝子名異實同本末則有序焉孝之或廢忠將焉出又况忠之日長孝之日短萬一有不諱悔之何益遂歸母見公喜病即愈又從先稼亭公游金剛山縱觀東海公曰今燕邸又如前日吾不可以以留遂如京師實聰陵元年己丑也歲辛卯秋九月玄陵即位行至遼陽省授密直司左副代言軍簿摠郎階奉常大夫藝文館直提學知製教兼春秋館編脩官知三司事有旨叅決機務然非有召未嘗詣內明年進右代言左司議大夫宰

相趙日新忌公公乞解職屏居德水莊既而丁外
艱日新聚群不逞誅殺所忌未幾伏誅癸巳四月
起復供職代言甲午二月遷左代言知軍簿司事
乙未正月掌成均試取全翊等九十九人拜奉翊
大夫判典校寺事藝文館提學同知春秋館事上
護軍其秋再遷版圖判書典理判書歲丙申姜資
正金剛降香金剛山命公護其行既至山曰吾疾
作欲少留願公善辭焉因居青蓮寺數月王召公
不獲已還朝五月奇氏之難作入密直爲提學官
制行拜銀青榮祿大夫樞密院直學士翰林學士

承旨上將軍事定賜安社功臣鐵券公謂諸公曰
功券即罪案也願賜相勉保終始如汾陽郭氏也
又曰君子不黨吾决不黨於人願同心奉王室無
私黨幸甚俄改副使歲丁酉進同知商議會議都
監事歲己亥進知院提點司天臺事辛丑冬沙賊
犯黃州勢甚逼廷臣不知所爲公從容決策南幸
其言曰國所恃者城池也糧食也今城未完倉無
儲萬一賊在四郊將何以守乎既至安東府進樞
密院使翰林學士承旨同脩國史明年賊平三元
帥功益高擅殺摠兵官鄭世雲則又曰今既殺摠

兵官矣柳某居中每出奇謀可畏也去之便公知之告于上曰衆怒難犯今諸將忌臣者徒以在殿下左右耳殿下如逐臣則臣一布衣耳誰復置齒牙閒邪於是出爲東京留守至府十有餘日措置已愜民望國家既正元帥罪名三月以知都僉議召進階匡靖大夫賜功臣號忠勤節義贊化六字吏民曰何不留公數月奪之棘乎其秋駕移于清同知貢舉取朴實等三十三人時稱得士冬遷評理提點書雲觀事洪氏有封翁主者在南陽貧乏不能自存上憐之下手教於按廉使李之泰賜米

之泰曰凡上命必由兩府而頒布于外今將柰何不敢不受又不敢拆閣之案止其人怒復之于內上謂之泰不恭將使使械之泰來罪且不測公固執不可上怒甚曰事皆由卿等耶目公曰出公趨出上復召公公伏於前具以之泰之語白之且曰如殿下怒不已臣恐後世以爲口實於是置之泰不問他日召公入公謝曰臣受恩既久而無纖芥之効反以口舌妄觸天威罪在不赦上賜黃金以慰之且曰賞卿之言也閒以盛滿難居乞骸骨保餘生上久而後許之封瑞寧君因請拜掃至京明

日又召歲癸卯駕還京以興王寺爲行宮賊用夜半潛入內殺直宿官上避於密室聞賊相語曰何故來遲賊曰殺洪某柳某故遲來既而諸將率兵入救公隨之入上曰謂卿已死不復再見及見卿面疑其思成聞卿之語疑始釋矣即日入城拜政堂文學冬十月兼監察大夫歲甲辰進僉議贊成事商議會議都監事藝文館大提學知春秋館事上護軍領書雲觀事歲乙巳三月封瑞寧君昉故也昉之出入禁闈外托浮屠內懷譎詐公稍抑之及其長髮冠顛領都僉議作威福中傷大臣氣焰

可畏每招公公絕不往來及其秋乞歸田里卜築伊山縣之伽耶山優游以自老京山樵隱先生寄以詩有已向危時安社稷更從平地作神仙之句歲戊申昉之浸潤既以其計得行縊公于靈光郡十二月二十一日也公之屏居也聞國家事異於平日未嘗不涕泗交下及其禍作家人以公平日之言送龍腦又謂不如走乃送良馬曰公其自擇公曰吾思之君父天也天可逃乎且生死有命固當順受亡將何之就死顏色如平時人皆爲之流涕及昉敗上始知其然悼甚有旨雪其寃謚文僖

歲壬子正月十一日以禮葬于德豐縣加也洞丙
辰十一月玄陵祔廟廷議配享公得與焉此公哀
榮之大槩也若其謀猷之密操履之詳有所薦引
未嘗言之其有所罪黜未嘗斷之於已遇大事
決大疑又未嘗猶豫其間蓋於精明仁恕兩得之
矣宜其嗣子賢也銘曰
文僖有質美玉之潔文僖有行薰風之發遇事精
彊存心惻怛相我玄陵夷險一節告老懸車矯命
賜玦命也奈何時哉昭雪升于大室允矣功烈天
道不爽赫如對越刻石幽室用告來哲

文敬李公墓誌銘并序

先稼亭公嘗知丁亥貢舉所取士多聞人文敬李
公年十五神采曄然當時已謂有父風云其後學
邃識高名日益重堂堂乎宰相之材矣及其病也
衆以為必無患也斯人豈止斯哉及其亡也又以
為生之不辰乎藥物之有誤乎何斯人而至於斯
乎士大夫相與弔於朝親戚故舊相與哭於其位
行路為之嗟惜上聞之悼甚命重賻下太常議謚
若曰樞密不應謚吾特褒岡者文臣服勞久政堂
文學松壽耳吾是以不能忘異體同功今岡而已

議既上上曰文敬唯罔足以當之嗚呼公可以無憾矣其友人上黨韓脩孟雲曲城廉興邦仲昌父謀於韓山李穡曰自吾友亡人孰不悲之然猶未免死吾友使可傳者傳而死則吾三人者之責而亦所以自慰其悲也於是以銘屬穡脩書興邦篆而其刻石則仲昌父孟雲實幹之嗚呼悲夫吾尚忍銘吾友也哉公諱罔字思卑初名綱避同列名遂改之姓李氏固城人曾祖諱尊庇判密直司事兼監察大夫有名慶陵朝祖諱瑀鐵城君父諱岳都僉議侍中謚文貞書法妙一時號杏村母洪氏

侍中謚忠正諱子藩之孫右代言諱承緒之女初以門功錄事幘頭店既弟丞慶順府於典儀爲直長主簿又爲令兵部爲負外門下省爲司諫吏部爲郎中戶部爲侍郎密直司爲代言知申事提學副使歷內外制館職至大提學官至奉翊大夫聰陵在書筵選充侍讀及遜位公從之居其立志可謂不苟矣上即位之五年乙未召見奇之即授主簿令掌符璽自是常在左右愈久愈謹其在吏部當遷公奏曰臣執筆注臣名臣實不敢上益重之辛丑秋爲慶尚道按廉使會北邊失守舉國南徙

入其境供侍充斥所至如歸士氣復振卒殲兇黨
蓋有助焉既還京代元文定掌銓選方邊報絡繹
上下維持各館所望而成駿功公之力居多侍中
之歿上親圖其形雖上所以褒異大功臣歆動衆
心其德甚盛亦由孝誠能有以動天也至於臨事
懼交友信好善之篤存心以平吾所以友也天或
假年坐廟堂決大疑行大政無不如志則吾將師
之而未果也悲之庸有既乎夫人郭氏考判開城
府事諱延俊女若干皆幼男一人今年生某月某
日卒某月某日葬城南藍村享年三十六其銘曰

胡界其全而不予年夢夢乎其天之未定也我鑄
斯銘千載而鳴尚有攷乎吾文敬也

有元資善大夫大常禮儀院使高麗國推忠
守義同德贊化功臣壁上三韓三重大匡益
山府院君謚文忠李公墓誌銘并序

益州之李其稱蓋以尚書左僕射諱周衍生參軍
諱列參軍生直史館諱英梓直史館生贈尚書左
僕射諱陽真僕射生銀青光祿大夫尚書左僕射
翰林學士承旨諱湊承旨生朝奉大夫國子典酒
寶文閣直學士知製誥諱行儉以直節聞其爲刑

部官同僚逼於勢屈訟之直者典酒死執不可會
疾作在告同僚幸於無公即決之人有夢利劍自
天而下斲刑部官吏未幾皆暴病死獨典酒無恙
至今稱誦典酒生承奉郎監察糾正諱崖取通直
郎中宋耽之女以至大戊申十二月二十四日生
公既而母亡養於宰相全公諱思義之家公之姊
夫也及全公存公已光顯矣如子事父全公歿事
其姊如母葬同其穴祭盡其禮老而不衰可謂能
後已至元庚辰公年三十又三矣上洛君金公諱
求墩順興君安公諱軸掌禮圍試公以郎將兼監

察糾正擢狀元至正辛巳再遷典儀注簿成均直
講歲壬午轉奉善大夫成均司藝藝文應教知製
教歲癸未加奉常移典校副今充春秋館修撰官
歲甲申進中顯大夫典校今密直司右副代言藝
文館直提學知製教乙酉遷至知申事其冬移典
理判書明年進監察大夫丁亥秋七月拜密直副
使戊子春正月進匡靖大夫判密直司使四月入
賀天壽聖節夏六月兼監察大夫歲庚寅拜政堂
文學歲壬辰閏三月遷僉議評理又兼監察大夫
冬十月改三司右使歲癸巳復入都僉議進贊成

事歲乙未知貢舉取安乙器等三十三人多爲達官聞人是歲玄陵辟爲東省都事拜受敕牒詣內謝恩未幾辭不就職進封三重大匡益山府院君歲辛丑沙賊犯我北鄙公禦之于竹田京城失守公以單騎追及行宮于中原上喜甚厚禮焉歲壬寅夏六月拜贊成事進判版圖司事藝文館大提學知春秋館是歲沙賊既奔潰京城新剏于兵廢事草創公受命而來量材度事指授方略朝無廢政勞來安輯給糧與種野無游民祀宗廟祭先聖先師廩生後內外學悉贍導成禮俗養育人材蓋

於投戈講藝息馬論道之義深有得焉歲癸卯迎駕還京奸臣崔儒奉德興君緣宙權倖謀廢玄陵受命將行於是命公奉表如京密直提學許綱輔之行至西京詣太祖原廟再拜誓曰吾君而不復位臣公遂之死不復還既至都皇后皇太子郊勞絡繹四月初三日帝在興聖宮命典瑞院使完澤篤召公入勞之公獻禮物既而皇后設饌厚慰謂公曰公既盡心孝吾母是吾親兄也敢不以待親兄之禮待公乎公曰周姜嫄大任大姒育聖基化風雅存焉及其中衰姜后待罪宣王以興褒妲呂

武覆宗絕祀美惡昭然千載龜鑑我高麗之於大朝也戎臣結爲兄弟於初天子定爲甥舅於後百有餘年魚水相得矧今殿下即周之姪姒也三韓之幸於斯爲大今王勤王敵愾爲國樹勲當行賞典昭示四方以激將帥之氣奈何逞私憾廢公義乎丙申之禍實我家盛滿不知止足之所致耳非王之罪也不知自咎而欲廢有功之主朝廷無人乎他日必爲天下笑願殿下善奏于帝復吾王逐奸臣幸甚幸甚皇后雖感其言怒猶未已遂令公奉德興東歸公托疾請留於是首高麗人在朝

者李公遂外皆從王行二十一日拜太常禮儀院使明日入奏臣生長邊方言語不通不習中國禮何敢冒寵取譏今將帥布列于外獲功者未賞臣恐天下有以議陛下也旣不得命二十七日之任資政院奉懿旨盛設禮食以饗同寮宗廟大享公再爲太常卿循蹈禮則觀者敬之於是贈祖祭酒公中奉大夫集賢學士考糾正公資善大夫典瑞院使祖妣鄭氏妣宋氏室金氏皆封隴西郡夫人皇太子以帝命召公同上萬壽山廣寒殿太子問殿額仁智之義公曰愛民之謂仁辨物之謂智帝

王用二字御四海萬世大平矣入殿指金玉之柱
又曰老人會見如此之柱乎公曰聞之帝王發政
施仁則所居之屋雖朽木猶金玉之堅不然則金
石之堅反如朽木也出殿賜王家奴太師伯撒里
少保坐命公坐其次禿魯帖木兒詹事立彈瑟太
子取而彈之未成曲捨之曰久不習忘之矣公即
跪曰憂民之心不至于忘則瑟上一二調忘之何
害帝在大液池舟上太子以公語奏之帝曰吾固
知此老賢者也汝外家唯此一人耳一日皇后問
兄平章家禍所由公曰貪財聚怨鮮有免者勢激

而然非王之心非王之罪也宦官朴不花密告于
皇后曰李某但爲其主豈念其親皇后久不召見
德興君既至遼陽路崔儒曰李某在都其心莫測
事或中變悔之何及重賂禿魯帖木兒朴不花必
欲得公以歸公知之謂其書狀官林撲曰吾既無
父母又無後位又極矣豈復有一毫顧藉意耶當
祝髮入山决不從彼也二人入奏帝不允秋七月
孛羅帖木兒引兵入城黜丞相搠思監代其位禿
堅帖木兒爲臺臣革弊政迺曰高麗王有功無罪
而爲小人所困盍先治之於是降詔復位械崔儒

以送公亦乞歸田里出齊化門使蒼頭吹笛謂從者曰天下之樂復有加於此者乎泐途馬困蒼頭以一矢買一束菽飼之公見之曰何故奪窮民之食乎截絲布以充其價閭山站無人粟積于野公問粟一束直木絲幾尺如其言書於兩端置于粟積中從者曰持馬者回必取之去何益不如不償之爲愈也公曰吾固知之矣然必如是然後吾心安焉耳十月二十五日入京詣閣門告曰奉使臣李公遂回略不及艱苦狀上厚待之時成均館工役方興公聞之大喜即解御賜金帶助其費驚城

聖節也稽實從之受業胄庠用文科躋膺仕以至
今日皆公之賜也銘其可辭乎銘曰

三冬而青松也惟貞百煉而剛鐵兮孔良懿哉文
忠委蛇朝中有冽其泉有熏其風盡忠所事帝嘉
其志成功不居人服其義從享大室僉同其吉匪
功之多迺德之一雖無子孫祧廟之存

坡平君尹公墓誌銘

并序

至正辛丑冬沙賊逼京城玄陵決策南幸士大夫
多棄官奔竄坡平君尹俊以前福州牧使匹馬扈
駕至廣州坐客舍門談咲自若予始得知其面蓋

奇偉人也予之在病中嘗問疾焉見其色若甚哀
予予至今不敢忘也嗚呼公之歿已五年矣而以
病餘拙文銘公之墓豈不可感也夫公諱倭字子
奇坡平縣人也十三世祖華達號三韓功臣生功
臣先之功臣生左僕射金剛左僕射生右僕射執
衡右僕射生推忠佐命平戎拓地鎮國功臣開府
儀同三司上柱國守大尉門下侍中判吏部事鈴
平郡開國伯食邑三千五百戶實封三百戶監修
國史文肅公瓘睿王時女真侵我疆文肅公率兵
逐去之女真遠遁立石紀功而還文肅生中書平

章事彥頤有志氣達死生之理將易箒有詩一篇
類禪者語平章生尚書兵部侍郎惇信侍郎生衛
尉少尹商季少尹生太常錄事諱復元於公爲高
祖錄事生曾祖監察御史諱純御史生祖鈴平府
院君諱珩鈴平生考少府尹諱諳娶萬戶判三司
事朴公諱之亮之女以元貞丁未七月某日生公
公年十四以門蔭授周陵直至元庚辰超授興威
衛精勇護軍階奉善大夫賜紫金魚袋明年陞奉
常兼通禮門副使興拜周旋皆中其度護軍四十
餘人多驍傑豪放不拘繩墨公動以禮法至今矜

式焉歲壬午進親禦軍護軍監試主司閔思平家
奴取柴城外而折生松班主印安適出郊法當禁
故禁之家奴不知其爲班主也聚擊之傷其脚王
大怒令重房壞主司宅公以謂奴信有罪矣其主
何與焉且今多士刮目放榜而壞主司宅主司何
心而考閱哉未幾上怒解事得寢歲癸未進中正
大夫三司左尹公以廉勤爲寶興庫官凡三年及
王被召赴都政丞洪彬會計錢物獨公無少汚洪
公嘆賞之歲己丑選臺臣執政者皆曰尹某世守
禮尚清節且知綱紀大體無以易此人也遂遷執

義多所立白雖未盡行名動一時持平鄭國經亦
以清謹慷慨爲人所望時察院有執義執綱持平
持節之語搢紳歎之歲庚寅以奉順大夫判少府
寺事知典法司事裁決平允人無怨言玄陵五年
乙未授監門衛上護軍重房諸吏素知公名敬憚
之不敢欺閱月而有福州牧使之命措置有法民
受其賜辛丑冬命其子今密直公曰吾不可不赴
行在所也汝其與汝母便道而去遂從王行爲慶
尚道點軍兵馬使旣而克復京師而錄功臣公功
在二等知公者皆謂公屈盡訟之公咲而不答歲

甲辰進奉翊大夫判典儀寺事歲壬子拜典法判
書甲寅冬封坡平君階大匡公嘗曰吾家侍中公
而下凡七世登科而吾父子悔之何及丙辰冬十
二月十二日以病卒于第享年七十明年正月甲
寅葬于松林先塋夫人崔氏奉常大夫司憲掌令
諱甬之女生四男二女長曰虎奉翊大夫密直副
使上護軍次皆天女長適判內府事金懷祖次適
知驪興郡事柳元茂孫男女若干人密直公娶知
善州事李公元厚之女生一男二女男曰云云女
長適中書舍人方恂次適閣門祗候南在內府生

三男四女長男曰瞻門下注書次曰盱次曰盼幼
女適護軍金佖餘皆幼驪興生六男一女長曰某
次曰某餘皆幼密直公端謹有志善書能碁嘗爲
玄陵所知玄陵命書古詩以進蓋賞其筆跡也公
曰月露風花非所以陳於王前乃書欺暗常不然
欺明當自戮難將一人手掩得天下目既進上謂
其譎諫澁踈之君子曰公於是不負所學矣嗚呼
坡平可謂有子矣密直公又曰吾父平居不喜飲
酒當飲又無量生而無疾性尚儉約少肉食暑必
具服寒不重裘其於聲色遠之又甚通制條格本

國判旨留意尤深天不與之命柰何柰何予於是
益知公之有子也銘曰
鈴平之封王錫尹公出師闢國乃碑其功襲封開
府在于公祖公克嗣之惟仕之膺惟公之名惟誼
之明位不稱德孰司其平幽堂之誌于求厥眎匪
我之謏公有賢子

東文選卷之一百二十七



